

Datum: 29.10.2020.
Broj: 02-04 (4640)

**Agencija za zaštitu ličnih podataka BiH
Dubrovačka 6
71000 Sarajevo**

PREDMET: INFORMACIJA, dostavlja se

Veza: Vaš Odgovor broj 03-I-02-1-758-2/20 od 26.10.2020.g.

Poštovani,

Dopisom pod navedenim brojem i datumom u vezi, odgovorili ste na dopis naše organizacije od 09.10.2020.g., u kojem smo apelovali na Vas da, imajući u vidu Vaše nadležnosti, predložite mehanizam zaštite obrade ličnih podataka građana Bosne i Hercegovine koji će se vezati za predstojeći izborni proces, a u cilju sprečavanja sve češćih zloupotreba.

U Odgovoru na koji se referiramo, između ostalog naveli ste da je „Članom 3.1. Izbornog zakona BiH propisano da su Centralni birački spisak i izvod iz Centralnog biračkog spiska javni, te da se pravo uvida u Centralni birački spisak ostvaruje u skladu sa odredbama ovog zakona“, te ste zaključili da „Izborni zakon BiH propisuje pravo na uvid, a ne na objavljivanje podataka iz Centralnog biračkog spiska i ne omogućava objavljivanje Centralnog biračkog spiska ni izvoda“.

Transparency International u BiH je mišljenja da je Vaše tumačenje odredbi Izbornog zakona BiH koje se odnose na Centralni birački spisak prilično restriktivno, posebno kada se uzme u obzir činjenica da sam zakon niti jednom svojom odredbom eksplicitno ne brani objavljivanje biračkog spiska. U članu 3.10. Izbornog zakona navedeno je koje sve lične podatke o državljanima Bosne i Hercegovine sadrži Evidencija Centralnog biračkog spiska, dok je u članu 3.11. propisano da se **objavljivanje podataka iz Centralnog biračkog spiska i stavljanje sadržaja na uvid javnosti vrši vodeći računa o principima zaštite ličnih podataka, a u skladu sa Zakonom o zaštiti ličnih podataka**. U tom smislu, jasan je i član 6. Zakona o zaštiti ličnih podataka BiH koji propisuje mogućnost da kontrolor obrađuje podatke (što predstavlja i širenje ili na drugi način omogućavanje pristupa podacima u skladu sa članom 3. stav 1. tačka 5.), ako je obrada ličnih podataka potrebna da bi se ispunio zadatak koji se izvršava u javnom interesu.

U odgovoru ste, s jedne strane, istakli da ste svjesni činjenice da su fer i poštenu izbore od najvećeg značaja za razvoj demokratskog društva, dok ste, sa druge strane, zauzeli stav da Agencija nije nadležna da bilo kom kontroloru, pa ni Centralnoj izbornoj komisiji BiH utvrđuje konkretna rješenja za zaštitu ličnih podataka, već je to njihova nadležnost i odgovornost. S tim u vezi, podsjećamo da Zakon o zaštiti ličnih podataka BiH u članu 40. predviđa da je Agencija pored ovlaštenja da se zabrani obrada podataka, ovlaštena i da donosi propise za sprovođenje, smjernice ili druge pravne akte, te daje savjete i mišljenja u vezi sa zaštitom ličnih podataka. Osim toga, Agenciju, kao samostalnu upravnu organizaciju i Zakon o upravi BiH obavezuje na međusobnu saradnju sa drugim javnim organima, posebno u kontekstu razmjene informacija i iskustava.

Naša organizacija, kao organizacija koja svakodnevno zaprima pojedinačne prijave građana koji se žale na kršenje Zakona o zaštiti ličnih podataka u kontekstu predizborne kampanje i predstojećeg izbornog procesa u Bosni i Hercegovini smatra da Vaš stav nikako ne doprinosi konstruktivnom rješavanju problema, te odstupa od glavnog cilja Zakona o zaštiti ličnih podataka BiH, a to je da se građanima Bosne i Hercegovine obezbijedi zaštita ljudskih prava i osnovnih sloboda, a naročito prava na privatnost i zaštitu podataka u pogledu obrade ličnih podataka koji se na njih odnose.

S poštovanjem,



Ivana Korajlić
Izvršni direktor
Transparency International u BiH